

PUN

INJIL MARK


"Lebuh John udah ditangkap, Jesus bejalai ngagai menua Galili, nusui Berita Manah Allah Taala. Ku Iyo bejaku, 'Timpuh udah datai, lalu Perintah Allah Taala nyau semak! Nesal ati ke dosa kita, lalu arapka Berita Manah' " (Mark 1:14, 15)



Injil Mark meh ke pemadu pandak ari empat iti injil ke madah pasal pengidup Jesus.

Tu meh cherita ke laju sereta dedat. Utai ke nyadi semina sekejap aja mansa mata kitai. Nuan enda ulih ninggalka sebarang utai, laban semina ke beguna aja disengkaum dia.

Dalam jaku ke pandak, injil Mark meh injil ungkup orang ba abad ti ke 21, ke alai semua utai nyadi ba timpuh ke majak laju, laban timpuh nya duit. Aram kitai ngena timpuh nya belajarka utai ke lebih beguna: “Berita Manah pasal Jesus Kristus, ti Anak Allah Taala” (*Mark 1:1*).



► Penulis Injil Mark:

- Misionari ke enda mujur.
- Diguna ba pengawa injil.

► Pun Injil Mark:

- Bekemas. Mark 1:1-8.
- Baptisa. Mark 1:9-13.
- Jaku ajar. Mark 1:14-15.



PENULIS INJIL MARK

MISIONARI KE ENDA MUJUR

"Lebuh Barnabas seduai Saul udah nembuka pengawa seduai iya, seduai iya lalu pulai ngagai Jerusalem, mai John ke mega dikumbai Mark enggau seduai iya" (Rasul 12:25)


Sebaka enggau pengabar injil ke bukai, Mark nadai nyebut nama iya empu. Iya agi nemiak lebuh maya utai ke ditulis iya nyadi, lalu tu engka ditemu iya kategal kaul iya begulai enggau rasul Peter (1 Pet. 5:13).

Indai John Mark tu meh ke bempu endur di Jerusalem ke alai bala anggota gerija begempuru sereta besampika Peter ke dalam rumah jil (Ras. 12:12).

Enda lama lepas tu, Barnabas enggau Saul (datai ngagai Jerusalem nganjung pemer) lalu mai John Mark enggau seduai ngagai Antiok (Ras. 12:25).

Lebuh Roh Kudus ngangauka Barnabas enggau Saul gawa nyadi misionari ngagai orang bansa kapir di Antiok, seduai lalu mai John Mark sama gawa begulai enggau seduai (Ras. 13:2-5).


Laban pengidup nyadi misionari tu ukai utai ti nyamai unku John Mark, ari nya iya lalu mutuska runding nikal ke Jerusalem (John 13:13).




DIGUNA BA PENGAWA INJIL

**"Semina Luke aja bisi enggau aku. Ambi Mark lalu bai iya enggau nuan, laban iya beguna dalam pengawa aku"
(2 Timoti 4:11)**

Lebuh Paul merambu pejalai misionari ti kedua, iya enggai agi mai John Mark begulai enggau iya gawa (*Ras. 15:36-38*). Paul begunaka penyaup ti kuat, ke nyukung lalu ukai nyadi ke pengeribat. Lalu Mark nadai layak ba pengawa tu.






Taja pia, Barnabas nemu anak buah iya tu ulih nyadi misionari ke manah. Nya alai iya lalu mai Mark enggau iya ngagai Saiprus, Paul seduai Silas mansang tunga ngagai menua Asia (*Ras. 15:39-41*).



Kitai nadai nemu utai ke nyadi lepas nya, tang kitai nemu Barnabas betul. Tiga iti endur ba surat ke ditulis iya, Paul nganggap Mark nyau nyadi orang ti "beguna ba pengawa misionari," reti nya manah enggau begulai gawa (*Kol. 4:10; Pil. 24; 2 Tim. 4:11*).

Terima kasih ke peluang ti kedua tu, kategal nya sehari tu, kitai ulih macha cherita ke manah ari injil Mark.





PUN INJIL MARK



BESEDIA

"Ku iya madah ngagai orang mayuh, Iya ke datai dudi ari aku lebih agi bekuasa ari aku, datai ke aku enda tau meremi lalu muka tali kasut Iya" (Mark 1:7)




Mark ngepunka injil iya lebuah ke madahka Allah Taala nyendia jalai ke Anak Iya (Mark 1:1-2; Mal. 3:1). Jalai ke berengkah ari astana serega, lalu tu mai Jesus ngagai regang, lepas nya Iya lalu disambut baru di serega din (Mark 16:19).

Dikena nyendiaka jalai tu, Allah Taala udah milih John Pemaptisa, ianya "nyawa ke nyada di menua puang" (Mark 1:3; Isa. 40:3).



Sebedau Jesus ngepunka pejalai Iya nyerahka pengidup Iya ngagai kitai, John nyendiaka ati orang mayuh nuju ngagai penesal sereta ngasuh sida dibaptisa (Mark 1:4-6).

Iya nyendia sida nerima Anak Allah Taala: Orang ke lebih bekuasa ari Iya empu, lebih layak agi; Iya deka maptisa orang ngena baptisa ti manah agi (Mark 1:7-8).



BAPTISA

"Lebuh maya nya Jesus datai ari Nasaret di menua Galili lalu dibaptisa ulih John ba Sungai Jordan" (Mark 1:9)



Jesus ngepunka pejalai Iya enggau chara ti manah bendar: Allah Taala Apai mandangka diri ngaku Iya Anak, Roh Kudus ngayanka diri enggau chara ke ulih dipeda (Mark 1:10-11). Ari pun iya bendar, Jesus ngayanka diri endang Allah Taala, Iya meh Anak Petara. Taja pia Iya ngayanka diri ba tubuh mensia:



Iya dibaptisa ulih John lalu ukai John dibaptisa Iya (Mark 1:9)



Iya diiring Roh Kudus (Mark 1:12)



Iya begunaka timpuh kediri begulai enggau Petara (Mark 1:13)



Iya diuji Sitan (Mark 1:13)



Iya betunga enggau utai ti tau nganu (Mark 1:13)



Melikat ngintu Iya (Mark 1:13)

Baka tu meh Jesus ngayanka diri ngagai kitai: Petara ti penuh lalu Mensia ti penuh. Iya meh Penyelamat enggau Menyadi, Tuhan enggau Teladan. Tu meh pemandang ti penuh pasal pengerindu Allah Taala ngagai mensia

“Mulia ke bisi ba Kristus meh janji pengerindu Allah Taala ke kitai. Tu nerang ngagai kitai pasal kuasa sampi, ke alai nyawa mensia datai ngagai pending Allah Taala, lalu peminta kitai diterima ba astana serega. Penampak ke datai ari pintu ti tebuka lalu datai ngagai pala Penebus kitai, penampak tu mega deka datai ngagai kitai lebu ti besampi minta saup ngelaban penguji. Nyawa ke bejaku enggau Jesus mega deka bejaku ngagai genap iku orang ti arap, ‘Tu Anak ke dikesayauka Aku. Aku rinduka Iya.’ ”

EGW (In the Heavenly Places - God Has Chosen Me, January 20)

JAKU AJAR

"Lebuh John udah ditangkap, Jesus bejalai ngagai menua Galili, nusui Berita Manah Allah Taala" (Mark 1:14)

Pun ajar Jesus mungkur tiga iti pekara (Mark 1:15)

"Timpuh udah datai"

Tu dituju ngagai nubuatan 70 minggu (*Dan. 9:24*). Ari dekri Artaserses taun 457 BC, ngagai maya Mesiah diurap, deka 69 minggu (*ayat 25*). Pekara tu nyadi amat lebh Jesus dibaptisa ba taun 27 AD. Setengah minggu lepas nya, taun 31 AD, Jesus pen mati (*ayat 27*).

"Perintah Allah Taala nyau semak"

Semaya pasal sempekat penyelamat berengkah deka nyadi.

"Nesal ati ke dosa kita lalu arapka Berita Manah"

Kangau ngambi bagi ba sempekat, ari ke nerima pengampun nengah pengarap ba Jesus.



Ajar kitai diatu mega nyengkaum tiga iti pekara tu: timpuh udah nyadi amat; Jesus deka datai; kitai mesti nesalka penyalah sereta arap, ngambika kitai ulih pulai begulai enggau Iya.

“Batang ajar Kristus meh, ‘Timpuh udah datai, lalu Perintah Allah Taala nyau semak! Nesal ati ke dosa kita, lalu arapka Berita Manah.’ Nya alai, berita injil ke dipadahka Penebus Empu tu endang bepelasarka jaku nubuatan. Timpuh ke udah datai ke disebut Iya, ngamatka timpuh ke udah dipadahka Gabriel ngagai Daniel....

Sebaka enggau berita penatai Kristus ti terubah ke madahka perintah pengasih Iya, baka nya mega penatai Iya ti kedua kali deka madah pasal perintah mulia Iya. Nya alai berita ti kedua sebaka enggau ti keterubah, sama bepelasarka jaku nubuatan.”